

Obezbjeđenje alternativnog i hitnog smještaja je budžetski prioritet

Petog novembra viši zamjenik visokog predstavnika Ambasador Gerhard Enver Schrömbgens pismom se obratio premijerima entiteta, premijerima svih kantona i načelnicima svih opština u Bosni i Hercegovini. U ovim pismima od bh. organa je tražena hitna procjena situacije vezane za alternativni i nužni smještaj ljudi koji još uvijek žive u imovini za koju je podnesen zahtjev za povrat, kao i za nastavak obnove, te planiranje odgovarajućih sredstava za pomenute svrhe.

Ove potrebe zauzimaju važno mjesto u novoj strategiji međunarodne zajednice za provedbu imovinskih zakona, koja je na snazi već mjesec dana. Ona od organa vlasti u cijeloj zemlji zahtijeva da poštuju odredbe imovinskih zakona, prema kojima pravo na povrat imovine ne ovisi o tome da li je privremenim korisnicima obezbijeden alternativni smještaj.

U svom daljem obraćanju BiH vlastima, danas je Ambasador Schrömbgens izjavio kako je: "krajnje vrijeme da se proces povratka okonča. Problem raseljenih lica i izbjeglica u BiH, koji još uvijek čekaju na povratak, mora se riješiti. Lokalni organi vlasti moraju pokazati volju da obezbijede potrebna sredstva kako bi se riješili preostali zahtjevi za povrat imovine, a istovremeno osiguralo da se svima koji još uvijek nemaju stambeno rješenje obezbijedi smještaj koji predviđa zakon.

Hitno je potrebno osigurati pomenute prioritete u toku priprema budžeta za 2003. godinu. Pri raspodjeli sredstava mora se imati na umu da se proces reformi ubrzava te da nema mjesta odlaganju normalizacije društva, u kojem bi se sva imovinska prava mogla slobodno realizirati i sve nade u

povratak postale stvarnost. Dok budu odlučivale o tome koji dio svojih prihoda će u sljedećoj godini potrošiti na pitanja povratka, od vlada na svim nivoima u ovoj zemlji traži se da pokažu puno opredjeljenje za okončanje ovog procesa.